

Kemiskinan merupakan antara faktor yang *mempengaruhi* pencapaian akademik pelajar dan punca yang menyebabkan aspek pendidikan kanak-kanak di negara-negara kurang *membangun* tidak diberi tumpuan, terutama di kalangan perempuan. Sebaliknya, institusi kekeluargaan di negara berkenaan lebih berminat menugaskan anak perempuan mengurus kerja-kerja di rumah, manakala ibu bapa keluar bekerja di sektor perladangan atau pertanian.

Berdasarkan kajian yang dijalankan, kanak-kanak lelaki di negara berkenaan terus dihantar ke sekolah untuk mempelajari bidang-bidang tertentu agar mereka boleh membantu keluarga pada masa akan datang. Pada masa yang sama, isu ini *dikaitkan* dengan perbelanjaan pendidikan yang semakin tinggi mengikut peringkat pengajian menyebabkan golongan miskin tidak mampu meneruskan persekolahan anak mereka atau terpaksa mengorbankan pendidikan anak perempuan kepada anak lelaki yang dianggap lebih *berpotensi* untuk memperoleh pekerjaan pada masa depan.

Faktor ini biasanya berlaku di negara sedang membangun kerana golongan perempuan dianggap hanya sesuai bekerja atau berada di rumah untuk mengurus rumah tangga dan anak, selain *menyifatkan* pendidikan tinggi tidak diperlukan untuk tujuan itu.

Dari segi kebudayaan pula, faktornya ialah tahap pendidikan yang rendah di kalangan ibu bapa, amalan dan adat tradisional (peranan wanita sebagai isteri dan ibu), perkahwinan awal dan sikap *kecurigaan* terhadap wanita yang berpendidikan.

- 1 Petikan di sebelah ditulis bertujuan untuk menggambarkan isu
 - A corak kehidupan masyarakat di negara-negara kurang membangun
 - B penderaan terhadap anak-anak perempuan di negara-negara kurang membangun
 - C nasib kanak-kanak lelaki yang terpaksa bersekolah demi masa depan keluarga
 - D pendidikan di negara-negara kurang membangun
- 2 Kanak-kanak perempuan tidak digalakkan memberi tumpuan terhadap pendidikan kerana
 - A pencapaian akademik mereka amat rendah berbanding kanak-kanak lelaki
 - B mereka lebih diharapkan untuk bekerja di sektor perladangan
 - C mereka tidak mudah mendapat pekerjaan berbanding kanak-kanak lelaki
 - D mereka lebih berminat untuk melakukan kerja-kerja rumah
- 3 Berdasarkan petikan, kanak-kanak lelaki dikatakan berperanan untuk
 - A mengubah kehidupan keluarga mereka
 - B mempelajari bidang-bidang tertentu
 - C membantu keluarga yang bekerja di sektor-sektor perladangan
 - D membasmi kemiskinan di kalangan penduduk
- 4 Pilih pernyataan yang **bukan** menjadi penyebab anak-anak perempuan tidak digalakkan bersekolah oleh ibu bapa mereka.
 - A Ibu bapa terpaksa keluar bekerja di sektor-sektor perladangan.
 - B Faktor kemiskinan.
 - C Mereka lebih sesuai membuat kerja-kerja rumah.
 - D Mereka tidak memerlukan kelulusan akademik untuk mengurus rumah tangga.